

Gedicht van Har Sniekers  
Torna | Cultura-café van 19 april 2015.

## DE GAARD

Es de lèste blajer bie-ein zeen geraektj  
en Thijs Zeelen hosanna van 18° praektj  
Es de forsythia knalgael steit te spettere  
en de maerel ziene zank lieëtj kwettere

Den toestj de gaard ziene dorre wintjerjas  
en nuuetj ós boete op 't terras  
Woea de taofel winktj mèt zien wachtendje steul  
en ós bevrietj van det opgesloete geveul

Den weurtj d'r gesjóffeldj, gegaedj en gesjörgdj,  
mèt leefdje vuuer noew plentjes gezörgdj  
Vol iefers gespaadj, gepoeatj en gezejdj  
en weer fluitendj 't gazon gemejdj

Ederein haet den gojen aard  
is drök doondje in de gaard  
Want wètj... vuuer dae krómme rök  
kriegs se hieël get sjoeans trök

Niks zoea fijn es eige thijm,  
kervel, biesloeak, rozemarijn,  
peterselie, basilicum of dille  
Waat höbs se nog mieër te wille?

Mer tovere oet dae greune hood  
lökjt neet altied aeve good  
Den te naat of te druueg, den te heit of te kaod  
den dabbe de katte door 't rieke zaod

En waat tunktj uch van tomate mèt rotte plekke,  
doorgesjoeate slaaj vol slekke,  
aerbieëre door de raengel angevraete  
of erte door de doeve opgegaete?

Jao, in zoea'ne gelpe gaard mèt al det vese  
zitte de sprieën dich ouch nog aan de kесе,  
de wölleboeane ónger de luus  
es se det allemaol toch zuus...

Want vergif spuite, nae, det doon wae neet  
pakke gewuuen de handjvaeger beet,  
duipe dem in de ummer netelesop  
en zaengele 't moos mèt al die roepse d'r op

Zoea maaktj eder op zien wies  
zich ein eige gaards paradies  
Want freutele in de gróndj  
hèltj ós bezig en gezóndj